

通鑑紀事本末

DS


747

12

S7553 Y8

1873

v. 80



通鑑紀事本末卷一百三十八

宋

建

安

袁

傅

綽

輟

明

人

會

編

洪

論

正

郭威

趙漢

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

郭威

通鑑紀事本末卷二百三十八

宋建安袁樞編輯

明太倉張溥論正

郭威篡漢

劉昫據河東附

後漢高祖乾祐元年帝自魏王承訓卒悲痛過甚春
正月甲子始不豫丁丑帝大漸召蘇逢吉楊邠史
弘肇郭威入受顧命曰承祐幼弱後事託在卿輩是
日帝殂二月辛巳朔立皇子左衛大將軍大內都
點檢承祐爲周王同平章事宣遺制令周王卽皇
帝位丁亥尊皇后曰皇太后蘇逢吉等爲相多

遷補官吏楊邠以爲虛費國用所奏多抑之逢吉等
不悅 三月中書侍郎兼戶部尙書同平章事李濤
上疏言今關西紛擾外禦爲急二樞密皆佐命功臣
官雖貴而家未富宜授以要害大鎮樞機之務在陛
下目前易以裁決逢吉禹珪自先帝時任事皆可委
也楊邠郭威聞之見太后泣訴稱臣等從先帝起艱
難中今天子取人言欲棄之於外況關西方有事臣
等何忍自取安逸不顧社稷若臣等必不任職乞畱
過山陵太后怒以讓帝曰國家勲舊之臣奈何聽人
言而逐之帝曰此宰相所言也因詰責宰相濤曰此

疏臣獨爲之它人無預丁丑罷濤政事勒歸私第
夏四月帝與左右謀以太后怒李濤離間欲更進用
二樞密以明非帝意左右亦疾二蘇之專欲奪其權
共勸之王午制以樞密使楊邠爲中書侍郎兼吏部
尙書同平章事樞密使如故以副樞密使郭威爲樞
密使又加三司使王章同平章事凡中書除官諸司
奏事帝皆委邠斟酌自是三相拱手政事盡決於邠
事有未更邠所可否者莫敢施行遂成凝滯三相每
進擬用人苟不出邠意雖簿尉亦不之與邠素不喜
書生常言國家府廩實甲兵彊乃爲急務至於文章

禮樂何足介意既恨二蘇排己又以其除官太濫爲眾所非欲矯其弊由是艱於除拜士大夫往往有自漢興至亡不霑一命者凡門蔭及百司入仕悉罷之雖由邠之愚蔽時人亦咎二蘇之不公所致云 秋七月庚申加樞密使郭威同平章事

隱帝乾祐二年三叛既平帝浸驕縱與左右狎暱飛龍使瑕丘後匡贊茶酒使太原郭允明以諂媚得幸帝好與之爲庾辭醜語太后屢戒之帝不以爲意七月太常卿張昭上言宜親近儒臣講習經訓不聽昭卽昭遠避高祖諱改之

三年夏四月楊邠求解樞密使帝遣中使諭止之宣
徽北院使吳虔裕在旁曰樞密重地難以久居當使
後來者迭爲之相公辭之是也帝聞之不悅辛巳以
虔裕爲鄭州防禦使 朝廷以契丹近入寇橫行河
北諸藩鎮各自守無扞禦之者議以郭威鎮鄴都使
督諸將以備契丹史弘肇欲威仍領樞密使蘇逢吉
以爲故事無之弘肇曰領樞密使則可以便宜從事
諸軍畏服號令行矣帝卒從弘肇議弘肇怨逢吉異
議逢吉曰以內制外順也今反以外制內其可乎壬
午制以威爲鄴都畱守天雄節度使樞密使如故仍

詔河北兵甲錢穀但見郭威文書立皆稟應明日朝
貴會飲於竇貞固之第弘肇舉大觴屬威厲聲曰昨
日廷議一何同異今日爲弟飲之逢吉與楊邠亦舉
觴曰是國家之事何足介意弘肇又厲聲曰安定國
家在長槍大劍安用毛錐王章曰無毛錐則財賦何
從可出自是將相始有隙 壬辰以左監門衛將軍
郭榮爲貴州刺史天雄牙內都指揮使榮本姓柴父
守禮郭威之妻兄也威未有子時養以爲子 五月
庚子郭威辭行言於帝曰太后從先帝久多歷天下
事陛下富於春秋有事宜稟其教而行之親近忠直

放遠讒邪善惡之間所宜明審蘇逢吉楊邠史弘肇
皆先帝舊臣盡忠徇國願陛下推心任之必無敗失
至於疆場之事臣願竭其愚駑庶不負驅策帝斂容
謝之曰癸丑王章置酒會諸朝貴酒酣爲手勢令史
弘肇不閑其事客省使閤晉卿坐次弘肇屢教之蘇
逢吉戲之曰旁有姓閤人何憂罰爵弘肇妻閤氏本
酒家倡也意逢吉譏之大怒以醜語詬逢吉逢吉不
應弘肇欲毆之逢吉起去弘肇索劍欲追之楊邠泣
止之曰蘇公宰相公若殺之置天子何地願熟思之
弘肇卽上馬去邠與之聯鑣送至其第而還於是將

相如水火矣帝使宣徽使王峻置酒和解之不能得
逢吉欲求出鎮以避之旣而中止曰吾去朝廷止煩
史公一處分吾齏粉矣王章亦忽忽不樂欲求外官
楊史固止之帝自卽位以來樞密使右僕射同平
章事楊邠總機政樞密使兼侍中郭威主征伐歸德
節度使侍衛親軍都指揮使兼中書令史弘肇典宿
衛三司使同平章事王章掌財賦邠頗公忠退朝門
無私謁雖不卻四方饋遺有餘輒獻之弘肇督察京
城道不拾遺是時承契丹蕩覆之餘公私困竭章据
撫遺利吝於出納以實府庫屬三叛連衡宿兵累年

而供饋不乏及事平賜予之外尙有餘積以是國家
粗安章聚斂刻急舊制田稅每斛更輸二升謂之雀
鼠耗章始令更輸二斗謂之省耗舊錢出入皆以八
十爲陌章始令入者八十出者七十七謂之省陌有
犯鹽礬酒麴之禁者錙銖涓滴罪皆死由是百姓愁
怨章尤不喜文臣嘗曰此輩授之握算不知縱橫何
益於用俸祿皆以不堪資軍者給之吏已高其估章
更增之帝左右嬖倖浸用事太后親戚亦干預朝政
邠等屢裁抑之太后有故人子求補軍職弘肇怒而
斬之武德使李業太后之弟也高祖使掌內帑帝卽

位尤蒙寵任會宣徽使闕業意欲之帝及太后亦諷執政邠弘肇以爲內使遷補有次不可以外戚超居乃止內客省使閭晉卿次當爲宣徽使久而不補樞密承旨聶文進飛龍使後匡贊翰林茶酒使郭允明皆有寵於帝久不遷官共怨執政文進并州人也平盧節度使劉銖罷青州歸久奉朝請未除官常戟手於執政帝初除三年喪聽樂賜伶人錦袍玉帶伶人詣弘肇謝弘肇怒曰士卒守邊苦戰猶未有以賜之汝曹何功而得此皆奪以還官帝欲立所幸耿夫人爲后邠以爲太速夫人卒嘗欲以后禮葬之邠復以

爲不可帝年益壯厭爲大臣所制邠弘肇嘗議事於
帝前帝曰審圖之勿令人有言邠曰陛下但禁聲有
臣等在帝積不能平左右因乘間譖之於帝云邠等
專恣終當爲亂帝信之當夜聞作坊鍛聲疑有急兵
達旦不寐司空同平章事蘇逢吉旣與弘肇有隙知
李業等怨弘肇屢以言激之帝遂與業文進匡贊允
明謀誅邠等議旣定入白太后太后曰茲事何可輕
發更宜與宰相議之業時在旁曰先帝嘗言朝廷大
事不可謀及書生懦怯誤人太后復以爲言帝忿曰
國家之事非閨閣所知拂衣而出十一月乙亥業等

以其謀告閭晉卿晉卿恐事不成詣弘肇第欲告之
弘肇以它故辭不見丙子旦邠等入朝有甲士數十
自廣政殿出殺邠弘肇章於東廡下文進亟召宰相
朝臣班於崇元殿宣云邠等謀反已伏誅與卿等同
慶又召諸軍將校至萬歲殿庭帝親諭之且曰邠等
以穉子視朕朕今始得爲汝主汝等免橫憂矣皆拜
謝而退又召前節度使刺史等升殿諭之分遣使者
帥騎收捕邠等親戚黨與僉從盡殺之弘肇待侍衛
步軍都指揮使王殷尤厚邠等死帝遣供奉官孟業
齎密詔詣澶州及鄴都令鎮寧節度使李洪義殺殷

又令鄴都行營馬軍都指揮使郭崇威步軍都指揮使眞定曹威殺郭威及監軍宣徽使王峻洪義太后之弟也又急詔徵天平軍節度使高行周平盧節度使符彥卿永興節度使郭崇義泰寧節度使慕容彥超匡國節度使薛懷讓鄭州防禦使吳虔裕陳州刺史李穀入朝以蘇逢吉權知樞密院事前平盧節度使劉銖權知開封府侍衛馬步都指揮使李洪建權判侍衛司事內侍省使閤晉卿權侍衛馬軍都指揮使洪建業之兄也時中外人情憂駭蘇逢吉雖惡弘肇而不預李業等謀聞變驚愕私謂人曰事太恩恩

主上倘以一言見問不至如此業等命劉銖誅郭威王峻之家銖極其慘毒嬰孺無免者命李洪建誅王殷之家洪建但使人守視仍飲食之丁丑使者至澶州李洪義畏懦慮王殷已知其事不敢發乃引孟業見殷殷囚業遣副使陳光穗以密詔示郭威威召樞密吏魏仁浦示以詔書曰奈何仁浦曰公國之大臣功名素著加之握彊兵據重鎮一旦爲羣小所構禍出非意此非辭說所能解時事如此不可坐而待死威乃召郭崇威曹威及諸將告以楊邠等冤死及有密詔之狀且曰吾與諸公拔荊棘從先帝取天下受

託孤之任竭力以衛國家今諸公已死吾何心獨生
君輩當奉行詔書取吾首以報天子庶不相累郭崇
威等皆泣曰天子幼冲此必左右羣小所爲若使此
輩得志國家其得安乎崇威願從公入朝自訴盪滌
鼠輩以清朝廷不可爲單使所殺受千載惡名翰林
天文趙修己謂郭威曰公徒死何益不若順眾心擁
兵而南此天啟也郭威乃畱其養子榮鎮鄴都命郭
崇威將騎兵前驅戊寅自將大兵繼之慕容彥超方
食得詔捨匕筯入朝帝悉以軍事委之己卯吳虔裕
入朝帝聞郭威舉兵南向議發兵拒之前開封尹侯

益曰鄴都戍兵家屬皆在京師官軍不可輕出不若閉城以挫其鋒使其母妻登城招之可不戰而下也慕容彥超曰侯益衰老爲懦夫計耳帝乃遣益及閭晉卿吳虔裕前保大節度使張彥超將禁軍趣澶州是日郭威已至澶州李洪義納之王殷迎謁慟哭以所部兵從郭威涉河帝遣內養鸞脫覘郭威威獲之以表置鸞脫衣領中使歸白帝曰臣昨得詔書延頸俟死郭崇威等不忍殺臣云此皆陛下左右貪權無厭者譖臣耳逼臣南行詣闕請罪臣求死不獲力不能制臣數日當至闕廷陛下若以臣爲有罪安敢逃

刑若實有譖臣者願執付軍前以快眾心臣敢不撫
諭諸軍退歸鄴都庚辰郭威趣滑州辛巳義成節度
使宋延渥迎降延渥洛陽人其妻高祖女永寧公主
也郭威取滑州庫物以勞將士且諭之曰聞侯令公
已督諸軍自南來今遇之交戰則非入朝之義不戰
則爲其所屠吾欲全汝曹功名不若奉行前詔吾死
不恨皆曰國家負公公不負國所以萬人爭奮如報
私讐侯益輩何能爲乎王峻徇於眾曰我得公處分
俟克京城聽旬日剽掠眾皆踊躍辛巳驚脫至大
梁前此帝議自往澶州聞郭威已至河上而止帝甚

有悔懼之色私謂竇貞固曰屬者亦太草草李業等請傾府庫以賜諸軍蘇禹珪以爲未可業拜禹珪於帝前曰相公且爲天子勿惜府庫乃賜禁軍人二十緡下軍半之將士在北者給其家仍使通家信以誘之壬午郭威軍至封丘人情恟懼太后泣曰不用李濤之言宜其亡也慕容彥超恃其驍勇言於帝曰臣視北軍猶蟻蠊耳當爲陛下生致其魁退見聶文進問北來兵數及將校姓名頗懼曰是亦劇賊未易輕也帝復遣左神武統軍袁義前威勝節度使劉重進等帥禁軍與侯益等會屯赤岡義象先之子也彥超

以大軍屯七里店癸未南北軍遇於劉子陂帝欲自
出勞軍太后曰郭威吾家故舊非死亡切身何至此
但按兵守城飛詔諭之觀其志趣必有辭理則君臣
之禮尙全慎勿輕出帝不從時扈從軍甚盛太后遣
使戒聶文進曰大須在意對曰有臣在雖郭威百人
可擒也至暮兩軍不戰帝還宮慕容彥超大言曰陛
下來日宮中無事幸再出觀臣破賊臣不必與之戰
但叱散使歸營耳甲申帝欲再出太后力止之不可
旣陳郭威戒其眾曰吾來誅羣小非敢敵天子也慎
勿先動久之慕容彥超引輕騎直前奮擊郭崇威與

前博州刺史李榮帥騎兵拒之彥超馬倒幾獲之彥超引兵退麾下死者百餘人於是諸軍奪氣稍稍降於北軍侯益吳虔裕張彥超袁義劉重進皆潛往見郭威威各遣還營又謂宋延渥曰天子方危公近親宜以牙兵往衛乘輿且附奏陛下願乘間早幸臣營延渥未至御營亂兵雲擾不敢進而還比暮南軍多歸於北慕容彥超與麾下十餘騎奔還兗州是夕帝獨與三相及從官數十人宿於七里寨餘皆逃潰乙酉旦郭威望見天子旌旗在高坂上下馬免胄往從之至則帝已去矣帝策馬將還宮至立化門劉銖在

門上問帝左右兵馬何在因射左右帝回轡西北至趙村追兵已至帝下馬入民家爲亂兵所殺蘇逢吉閻晉卿郭允明皆自殺聶文進挺身走軍士追斬之李業犇陝州後匡贊犇兖州郭威聞帝遇弑號慟曰老夫之罪也威至立化門劉錫雨射城外威自迎春門入歸私第遣前曹州防禦使何福進將兵守明德門諸軍大掠通夕煙火四發軍士入前義成節度使白再榮之第執再榮盡掠其財旣而進曰某等昔嘗趨走麾下一旦無禮至此何面目復見公遂刎其首而去吏部侍郎張允家貲以萬計而性吝雖妻亦不

之委常自繫眾鑰於衣下行如環珮是夕匿於佛殿藻井之上登者浸多板壞而墜軍士掠其衣遂以凍卒初作坊使賈延徽有寵於帝與魏仁浦爲鄰欲併仁浦所居以自廣屢譖仁浦於帝幾至不測至是有擒延徽以授仁浦者仁浦謝曰因亂而報怨吾所不爲也郭威聞之待仁浦益厚右千牛衛大將軍棗彊趙鳳曰郭侍中舉兵欲誅君側之惡以安國家耳而鼠輩敢爾乃賊也豈侍中意邪執弓矢踞胡床坐於巷首掠者至輒射殺之里中皆賴以全丙戌獲劉銖李洪建囚之銖謂其妻曰我死汝且爲人婢乎妻曰

以公所爲雅當然耳王殷郭崇威言於郭威曰不止
剽掠今夕止有空城耳威乃命諸將分部禁止掠者
不從則斬之至晡乃定竇貞固蘇禹珪自七里寨逃
歸郭威使人訪求得之尋復其位貞固爲相值楊史
弄權李業等作亂但以凝重處其間自全而已郭威
命有司遷隱帝梓宮於西宮或請如魏高貴鄉公故
事葬以公禮威不許曰倉猝之際吾不能保衛乘輿
罪已大矣況敢貶君乎太師馮道帥百官謁見郭威
威見猶拜之道受拜如平時徐曰侍中此行不易丁
亥郭威帥百官詣明德門起居太后且奏稱軍國事

殷請早立嗣君太后誥稱郭允明弑逆神器不可無主河東節度使崇忠武節度使信皆高祖之弟武寧節度使贇開封尹勳高祖之子其令百官議擇所宜贇崇之子也高祖愛之養視如子郭威王峻入見太后於萬歲宮請以勳爲嗣太后曰勳久羸疾不能起威出諭諸將諸將請見之太后令左右以臥榻舉之示諸將諸將乃信之於是郭威與峻議立贇己丑郭威帥百官表請以贇承大統太后誥所司擇日備法駕迎贇卽皇帝位郭威奏遣太師馮道及樞密直學士王度祕書監趙上交詣徐州奉迎郭威之討三叛

也每見朝廷詔書處分軍事皆合機宜問使者誰爲
此詔使者以翰林學士范質對威曰宰相器也入城
訪求得之甚喜時大雪威解所服紫袍衣之令草太
后誥令迎新君儀注蒼黃之中討論撰定皆得其宜
初隱帝遣供奉官押班陽曲張永德賜昭義節度使
常思生辰物永德郭威之壻也會楊邠等誅密詔思
殺永德思素聞郭威多奇異囚永德以觀變及威克
大梁思乃釋永德而謝之庚寅郭威帥羣臣上言比
皇帝到闕動涉浹旬請太后臨朝聽政 壬辰太后
始臨朝以王峻爲樞密使袁義爲宣徽南院使王殷

爲侍衛馬步軍都指揮使郭崇威爲侍衛馬軍都指揮使曹威爲侍衛步軍都指揮使陳州刺史李穀權判三司 劉銖李洪建及其黨皆梟首於市而赦其家郭威謂公卿曰劉銖屠吾家吾復屠其家怨讐反覆庸有極乎由是數家獲免王殷屢爲洪建請免死郭威不許後匡贊至兗州慕容彥超執而獻之李業至陝州其兄保義節度使洪信不敢匿於家業懷金將奔晉陽至絳州盜殺之而取其金 鎮州邢州奏契丹主將數萬騎入寇攻內丘五日不克死傷甚眾有戍兵五百叛應契丹引契丹入城屠之又陷饒陽

太后敕郭威將大軍擊之國事權委竇貞固蘇禹珪
王峻軍事委王殷十二月甲午朔郭威發大梁丁
酉以翰林學士戶部侍郎范質爲樞密副使武寧
節度使贊畱右都押牙鞏廷美元從都教練使楊溫守
徐州與馮道等西來在道仗衛皆如王者左右呼萬
歲郭威至滑州畱數日贊遣使慰勞諸將受命之際
相顧不拜私相謂曰我輩屠陷京師其罪大矣若劉
氏復立我輩尙有種乎己酉威聞之卽引兵趣澶州
辛亥遣蘇禹珪如宋州迎嗣君王子郭威度河館
於澶州癸丑旦將發將士數千人忽大譟威命閉門

將士踰垣登屋而入曰天子須侍中自爲之將士已與劉氏爲仇不可立也或裂黃旗以被威體共扶抱之呼萬歲震地因擁威南行威乃上太后牋請奉漢宗廟事太后爲母丙辰至韋城下書撫諭大梁士民以昨離河上在道秋毫不犯勿有憂疑戊午威至七里店竇貞固帥百官出迎拜謁因勸進威營於臯門村武寧節度使贇已至宋州王峻王殷聞澶州軍變遣侍衛馬軍都指揮使郭崇威將七百騎往拒之又遣前申州刺史馬鐸將兵詣許州巡檢崇威忽至宋州陳於府門外贇大驚闔門登樓詰之對曰澶州

軍變郭公慮陛下未察故遣崇威來宿衛無它也贊
召崇威崇威不敢進馮道出與崇威語崇威乃登樓
贊執崇威手而泣崇威以郭威意安諭之少頃崇威
出時護聖指揮使張令超帥部兵爲贊宿衛徐州判
官董裔說贊曰觀崇威視瞻舉措必有異謀道路皆
言郭威已爲帝而陛下深入不止禍其至哉請急召
張令超諭以禍福使夜以兵劫崇威奪其兵明日掠
睢陽金帛募士卒北走晉陽彼新定京邑未暇追我
此策之上也贊猶豫未決是夕崇威密誘令超令超
帥眾歸之贊大懼郭威遺贊書云爲諸軍所迫召馮

道先歸畱趙上交王度奉侍道辭行贊曰寡人此來所恃者以公三十年舊相故無疑耳今崇威奪吾衛兵事危矣公何以爲計道默然客將賈貞數目道欲殺之贊曰汝輩勿草草此無預馮公事崇威遷贊於外館殺其腹心董裔賈貞等數人已未太后誥廢贊爲湘陰公馬鐸引兵入許州劉信惶惑自殺庚申太后誥以侍中監國百官藩鎮相繼上表勸進壬戌夜監國營有步軍將校醉揚言晡者澶州騎兵扶立今步兵亦欲扶立監國斬之

後周太祖廣順元年春正月丁卯漢太后下誥授監

國符寶卽皇帝位監國白皐門入宮卽位於崇元殿
制曰朕周室之裔號叔之後國號宜曰周改元大赦
楊邠史弘肇王章等皆贈官官爲斂葬仍訪其子孫
敘用之凡倉場庫務掌納官吏無得收斗餘稱耗舊
所進羨餘物悉罷之犯竊盜及姦者並依晉天福元
年以前刑名罪人非反逆無得誅及親族籍沒家貲
唐莊宗明宗晉高祖各置守陵千戶漢高祖陵職員
宮人時月薦享及守陵戶並如故初唐衰多盜不用
律文更定峻法竊盜賊三匹者死晉天福中加至五
匹姦有夫婦人無問彊和男女並死漢法竊盜一錢

以上皆死又罪非反逆往往族誅籍沒故帝卽位首
革其弊初楊邠以功臣國戚爲方鎮者多不閑吏事
乃以三司軍將補都押牙孔目官內知客其人自恃
敕補多專橫節度使不能制至是悉罷之 戊辰以
前復州防禦使王彥超權武寧節度使 漢李太后
遷居西宮己巳上尊號曰昭聖皇太后 癸酉加王
峻同平章事 以衛尉卿劉皞主漢隱帝之喪 初
河東節度使兼中書令劉崇聞隱帝遇害欲起兵南
向聞迎立湘陰公乃止曰吾兒爲帝吾又何求太原
少尹李驤陰說崇曰觀郭公之心終欲自取公不如

疾引兵逾太行據孟津俟徐州相公卽位然後還鎮
則郭公不敢動矣不然且爲所賣崇怒曰腐儒欲離
間吾父子命左右曳出斬之驤呼曰吾負經濟之才
而爲愚人謀事死固甘心家有老妻願與之同死崇
并其妻殺之且奏於朝廷示無二心及贊廢崇乃遣
使請贊歸晉陽詔報以湘陰公比在宋州今方取歸
京師必令得所公勿爲憂公能同力相輔當加王爵
永鎮河東鞏廷美楊溫聞湘陰公贊失位奉贊妃董
氏據徐州拒守以俟河東援兵帝使贊以書諭之廷
美溫欲降而懼死帝復遣贊書曰爰念斯人盡心於

主足以賞其忠義何由責以悔尤俟新節度使入城當各除刺史公可更以委曲示之 丙子帝帥百官詣西宮爲漢隱帝舉哀成服皆如天子禮 慕容彥超遣使入貢帝慮其疑懼賜詔慰安之曰今兄事已至此言不欲繁望弟扶持同安億兆 戊寅殺湘陰公於宋州 是日劉崇卽皇帝位於晉陽仍用乾祐年號所有者并汾忻代嵐憲隆蔚沁遼麟石十二州之地以節度判官鄭珙爲中書侍郎觀察判官滎陽趙華爲戶部侍郎並同平章事以次子承鈞爲侍衛親軍都指揮使太原尹以節度副使李存瓌爲代州

防禦使裨將武安張元徽爲馬步軍都指揮使陳光裕爲宣徽使北漢主謂李存瓌張元徽曰朕以高祖之業一朝墜地今日位號不得已而稱之顧我是何天子汝曹是何節度使邪由是不建宗廟祭祀如家人宰相俸錢月止百緡節度使止三十緡自餘薄有資給而已故其國中少廉吏客省使河南李光美嘗爲直省官頗諳故事北漢朝廷制度皆出於光美北漢主聞湘陰公死哭曰吾不用忠臣之言以至於此爲李驥立祠歲時祭之 己卯以太師馮道爲中書令加竇貞固侍中蘇禹珪司空 初北漢主立契丹主

使聿撙遺劉承鈞書北漢主使承鈞復書稱本朝淪亡紹襲帝位欲循晉室故事求援北朝契丹主大喜北漢主發兵屯陰地黃澤團栢丁亥以承鈞爲招討使與副招討使白從暉都監李存瓌將步騎萬人寇晉州從暉吐谷渾人也郭崇威更名崇曹威更名

英二月丁酉以皇子天雄牙內都指揮使榮爲鎮寧節度使選朝士爲之僚佐以侍御史王敏爲節度判官右補闕崔頌爲觀察判官校書郎王朴爲掌書記頌協之子朴東平人也戊戌北漢兵五道攻晉州節度使王晏閉城不出劉承鈞以爲怯蟻附登城

晏伏兵奮擊北漢兵死傷者千餘人承鈞遣副兵馬使安元寶焚晉州西城元寶來降承鈞乃移軍攻隰州 癸卯隰州刺史許遷遣步軍都指揮使孫繼業迎擊北漢兵於長壽村執其將程筠等殺之未幾北漢兵攻州城數日不克死傷甚眾乃引兵去遷鄆州人也 丁未契丹主遣其臣裒骨支與朱憲偕來賀卽位 丁巳遣尙書右丞田敏使契丹北漢主遣通事舍人李訾使於契丹乞兵爲援 詔加泰寧節度使慕容彥超中書令遣翰林學士魚崇諒詣兗州諭指崇諒卽崇遠也彥超上表謝三月壬戌詔報之曰

向以前朝失德少主用讒倉猝之間召卿赴闕卿卽
奔馳應命信宿至京救國難而不顧身聞君召而不
俟駕以至天亡漢祚兵散梁郊降將敗軍相繼而至
卿卽便回馬首徑返龜陰爲主爲時有終有始所謂
危亂見忠臣之節疾風知勁草之心若使爲臣者皆
能如茲則有國者誰不欲用所言朕潛龍河朔之際
平難浚郊之時緣不奉示諭之言亦不得差人至行
闕且事主之道何必如斯若或二三於漢朝又安肯
忠信於周室以此爲懼不亦過乎卿但悉力推心安
民體國事朕之節如事故君不惟黎庶獲安抑亦社

稷是賴但堅表率未議替移由衷之誠言盡於此
王彥超奏克徐州殺鞏廷美 北漢李訢至契丹契
丹主使拽刺梅里報之 夏四月契丹主遣使如北
漢告以周使田敏來約歲輸錢十萬緡北漢主使鄭
珙以厚賂謝契丹自稱姪皇帝致書於叔天授皇帝
請行冊禮 五月己巳遣左金吾將軍姚漢英等使
於契丹契丹畱之 辛未北漢禮部侍郎同平章事
鄭珙卒於契丹 六月辛亥以樞密使同平章事王
峻爲左僕射兼門下侍郎樞密副使兵部侍郎范質
戶部侍郎判三司李穀爲中書侍郎並同平章事穀

仍判三司司徒兼侍中竇貞固司空兼中書侍郎同
平章事蘇禹珪並罷守本官癸丑范質參知樞密院
事丁巳以宣徽北院使翟光鄴兼樞密副使初帝討
河中已爲人望所屬李穀時爲轉運使帝數以微言
諷之穀但以人臣盡節爲對帝以是賢之卽位首用
爲相時國家新造四方多故王峻夙夜盡心知無不
爲軍旅之謀多所裨益范質明敏彊記謹守法度李
穀沈毅有器略在帝前論議辭義忼慨善譬諭以開
主意契丹遣燕王述輶等冊命北漢主爲大漢神
武皇帝妃爲皇后北漢主更名旻秋七月北漢主

遣翰林學士博興衛融等詣契丹謝冊禮且請兵
八月壬戌葬漢隱帝於潁陵 九月北漢主遣招討
使李存瓌將兵自團柏入寇契丹欲引兵會之與酋
長議於九十九泉諸部皆不欲南寇契丹主彊之癸
亥行至新州之西火神淀燕王述輒及偉王之子太
寧王漚僧作亂弑契丹主而立述輒契丹主德光之
子齊王述律逃入南山諸部奉述律以攻述輒漚僧
殺之并其族黨立述律爲帝改元應歷自火神淀入
幽州遣使告於北漢北漢主遣樞密直學士上黨王
得中如契丹賀卽位復以叔父事之請兵以擊晉州

契丹主年少好遊戲不親國事每夜酣飲達旦乃寐
日中方起國人謂之睡王後更名明 十月辛卯潞
州巡檢陳思讓敗北漢兵於虎亭 契丹遣彰國節
度使蕭禹厥將奚契丹五萬會北漢兵入寇北漢主
自將兵二萬自陰地關寇晉州丁未軍於城北三面
置寨晝夜攻之遊兵至絳州時王晏已離鎮王彥超
未至巡檢使王萬敢權知晉州與龍捷都指揮使史
彥超虎捷指揮使何徽共拒之史彥超雲州人也
十一月帝以北漢契丹之兵猶在晉州甲子以王峻
爲行營都部署將兵救之詔諸軍皆受峻節度聽以

便宜從事得自選擇將吏乙丑峻行帝自至城西餞之王峻畱陝州旬日帝以北漢攻晉州急憂其不守議自將由澤州路與峻會兵救之且遣使諭峻十二月戊子朔下詔以三日西征使者至陝峻因使者言於帝曰晉州城堅未易可拔劉崇兵鋒方銳不可力爭所以駐兵待其氣衰耳非臣怯也陛下新卽位不宜輕動若車馬出汜水則慕容彥超引兵入汴大事去矣帝聞之自以手提耳曰幾敗吾事庚寅敕罷親征初泰寧節度使兼中書令慕容彥超聞徐州平疑懼愈甚乃招納亡命畜聚薪糧潛以書結北漢吏

獲其書以聞又遣人詐爲商人求援於唐帝遣通事
舍人鄭好謙就申慰諭與之爲誓彥超益不自安屢
遣都押牙鄭麟詣闕僞輸情款實覘機事又獻天平
節度使高行周書其言皆謗毀朝廷與彥超相結之
意帝笑曰此彥超之詐也以書示行周行周上表謝
恩旣而彥超反迹益露丙申遣閤門使張凝將兵赴
鄆州巡檢以備之 庚子王峻至絳州乙巳引兵趣
晉州晉州南有蒙阮最爲險要峻憂北漢兵據之是
日聞前鋒已度蒙阮喜曰吾事濟矣 慕容彥超奏
請入朝帝知其詐卽許之旣而復稱境內多盜未敢

離鎮 北漢主攻晉州久不克會大雪民相聚保山
寨野無所掠軍乏食契丹思歸聞王峻至蒙阮燒營
夜遁峻入晉州諸將請亟追之峻猶豫未決明日乃
遣行營馬軍都指揮使仇弘超都排陳使藥元福左
廂排陳使陳思讓康延沼將騎兵追之及於霍邑縱
兵奮擊北漢兵墜崖谷死者甚眾霍邑道隘延沼畏
懦不急追由是北漢兵得度藥元福曰劉崇悉發其
眾挾胡騎而來志吞晉絳今氣衰力憊狼狽而遁不
乘此翦撲必爲後患諸將不欲進王峻復遣使止之
遂還契丹比至晉陽士馬什喪三四蕭禹厥恥無功

釘大酋長一人於市旬日而斬之北漢主始息意於
進取北漢土瘠民貧內供軍國外奉契丹賦繁役重
民不聊生逃入周境者甚眾

二年正月慕容彥超發鄉兵入城引泗水注壕中爲
戰守之備又多以旗幟授諸鎮將令募羣盜剽掠鄰
境所在奏其反狀甲子敕沂密二州不復隸秦寧軍
以待衛步軍都指揮使昭武節度使曹英爲都部署
討彥超齊州防禦使史延超爲副部署皇城使河內
向訓爲都監陳州防禦使藥元福爲行營馬步都虞
候帝以元福宿將命英訓無得以軍禮見之二人皆

父事之唐主發兵五千軍於下邳以援彥超聞周兵將至退屯沘陽徐州巡檢使張令彬擊之大破唐兵殺溺死者千餘人獲其將燕敬權初彥超以周室新造謂其易搖故北召北漢及契丹南誘唐人使侵邊鄙冀朝廷犇命不暇然後乘間而動及北漢契丹自晉州北走唐兵敗於沘陽彥超之勢遂沮壬申王峻自晉州還入見曹英等至兗州設長圍慕容彥超屢出戰藥元福皆擊敗之彥超不敢出十餘日長圍合遂進攻之初彥超將反判官崔周度諫曰魯詩書之國自伯禽以來不能霸諸侯然以禮義守之可以

長世公於國家非有私憾胡爲自疑況主上開諭勤至苟撤備歸誠則坐享泰山之安矣獨不見杜中令安襄陽李河中竟何所成乎彥超怒以周度阿庇司馬閻弘魯斬於市 夏四月帝以曹英等攻兖州久未克乙卯下詔親征以李穀權東京畱守兼判開封府鄭仁誨權大內都巡檢又以侍衛馬軍都指揮使郭崇充在京都巡檢 五月庚申帝發大梁戊辰至兖州己巳帝使人招諭慕容彥超城上人語不遜庚午命諸軍進攻先是術者紿彥超云鎮星行至角亢角亢兖州之分其下有福彥超乃立祠而禱之令民

家皆立黃幡彥超性貪吝官軍攻城急猶瘞藏珍寶
由是人無鬪志將卒相繼有出降者乙亥官軍克城
彥超方禱鎮星祠帥眾力戰不勝乃焚鎮星祠與妻
赴井死子繼勳出走追獲殺之官軍大掠城中死者
近萬人丁丑以端明殿學士顏衍權知兗州事癸
未降泰寧軍爲防禦州

顯德元年春正月壬辰帝殂晉王榮卽皇帝位北漢
主聞太祖晏駕甚喜謀大舉入寇遣使請兵於契丹
二月契丹遣其武定節度使政事令楊充將萬餘騎
如晉陽北漢主自將兵三萬以義成節度使白從暉

爲行軍都部署武寧節度使張元徽爲前鋒都指揮使與契丹自團柏南趣潞州 北漢兵屯梁侯驛昭義節度使李筠遣其將穆令均將步騎二千逆戰筠自將大軍壁於太平驛張元徽與令均戰陽不勝而北令均逐之伏發殺令均俘斬士卒千餘人筠遁歸上黨嬰城自守筠卽李榮也避上名改焉世宗聞北漢主入寇欲自將兵禦之羣臣皆曰劉崇自平陽遁走以來勢蹙氣沮必不敢自來陛下新卽位山陵有日人心易搖不宜輕動宜命將禦之帝曰崇幸我大喪輕朕年少新立有吞天下之心此必自來朕不可

不往馮道固爭之帝曰昔唐太宗定天下未嘗不自
行朕何敢偷安道曰未審陛下能爲唐太宗否帝曰
以吾兵力之彊破劉崇如山壓卵耳道曰未審陛下
能爲山否帝不悅惟王溥勸行帝從之三月北漢
乘勝進逼潞州丁丑詔天雄節度使符彥卿引兵自
磁州固鎮出北漢軍後以鎮寧節度使郭崇副之又
詔河中節度使王彥超引兵自晉州東出邀北漢軍
以保義節度使韓通副之又命馬軍都指揮使寧江
節度使樊愛能步軍都指揮使清淮節度使何徽義
成節度使白重贊鄭州防禦使史彥超前耀州團練

使符彥能將兵先趣澤州宣徽使向訓監之重贊憲州人也 癸未帝命馮道奉梓宮赴山陵以鄭仁誨爲東京畱守乙酉帝發大梁庚寅至懷州帝欲兼行速進控鶴都指揮使眞定趙晁私謂通事舍人鄭好謙曰賊勢方盛宜持重以挫之好謙言於帝帝怒曰汝安得此言必爲人所使言其人則生不然必死好謙以實對帝命并晁械於州獄壬辰帝過澤州宿於州東北北漢主不知帝至過潞州不攻引兵而南是夕軍於高平之南癸巳前鋒與北漢兵遇擊之北漢兵卻帝慮其遁去趣諸軍亟進北漢主以中軍陳於

巴公原張元徽軍其東楊衮軍其西眾頗嚴整時河陽節度使劉詞將後軍未至眾心危懼而帝志氣益銳命白重贊與侍衛馬步都虞候李重進將左軍居西樊愛能何徽將右軍居東向訓史彥超將精騎居中央殿前都指揮使張永德將禁兵衛帝帝介馬自臨陳督戰北漢主見周軍少悔召契丹謂諸將曰吾自用漢軍可破也何必契丹今日不惟克周亦可使契丹心服諸將皆以爲然楊衮策馬前望周軍退謂北漢主曰勅敵也未可輕進北漢主奮髯曰時不可失請公勿言試觀我戰衮默然不悅時東北風方盛

俄而忽轉南風北漢副樞密使王延嗣使司天監李義白北漢主云時可戰矣北漢主從之樞密直學士王得中扣馬諫曰義可斬也風勢如此豈助我者邪北漢主曰吾計已決老書生勿妄言且斬汝麾東軍先進張元徽將千騎擊周右軍合戰未幾樊愛能何徽引騎兵先遁右軍潰步兵千餘人解甲呼萬歲降於北漢帝見軍勢危白引親兵犯矢石督戰太祖皇帝時爲宿衛將謂同列曰主危如此吾屬何得不致死又謂張永德曰賊氣驕力戰可破也公麾下多能左射者請引兵乘高西出爲左翼我引兵爲右翼以

擊之國家安危在此一舉永德從之各將二千人進戰太祖皇帝身先士卒馳犯其鋒士卒死戰無不一當百北漢兵披靡內殿直夏津馬仁瑀謂眾曰使乘輿受敵安用我輩躍馬引弓大呼連斃數十人士氣益振殿前右番行首馬全义言於帝曰賊勢極矣將爲我擒願陛下按轡勿動徐觀諸將破之卽引數百騎進陷陳北漢主知帝自臨陳褒賞張元徽趣使乘勝進兵元徽前略陳馬倒爲周兵所殺元徽北漢之驍將也北軍由是奪氣時南風益盛周兵爭奮北漢兵大敗北漢主自舉赤幟收兵不能止楊衮畏周兵

之彊不敢救且恨北漢主之語全軍而退樊愛能何
徽引數千騎南走控弦露刃剽掠輜重役徒驚走失
亡甚多帝遣近臣及親軍校追諭止之莫肯奉詔使
者或爲軍士所殺揚言契丹大至官軍敗績餘眾已
降虜矣劉詞遇愛能等於塗愛能等止之詞不從引
兵而北時北漢主尙有餘眾萬餘人阻澗而陳薄暮
詞至復與諸軍擊之北漢兵又敗殺王延嗣追至高
平僵尸滿山谷委棄御物及輜重器械雜畜不可勝
紀是日帝宿於野次得步兵之降敵者皆殺之樊愛
能等聞周兵大捷與士卒稍稍復還有達曙不至者

甲午休兵於高平選北漢降卒數千人爲效順指揮
命前武勝行軍司馬唐景思將之使戍淮上餘二千
餘人賜賞裝縱遣之李穀爲亂兵所迫潛竄山谷數
日乃出丁酉帝至潞州北漢主自高平被褐戴笠乘
契丹所贈黃驢帥百餘騎由雕窠嶺遁歸宵迷俘村
民爲導誤之晉州行百餘里乃覺之殺導者晝夜北
走所至得食未舉筯或傳周兵至輒蒼黃而去北漢
主衰老力憊伏於馬上晝夜馳驟殆不能支僅得入
晉陽帝欲誅樊愛能等以肅軍政猶豫未決己亥晝
臥行宮帳中張永德侍側帝以其事訪之對曰愛能

等素無大功忝冒節鉞望敵先逃死未塞責且陛下
方欲削平四海苟軍法不立雖有熊羆之士百萬之
眾安得而用之帝擲枕於地大呼稱善卽收愛能徽
及所部軍使以上七十餘人責之曰汝輩皆累朝宿
將非不能戰今望風奔遁者無它正欲以朕爲奇貨
賣與劉崇耳悉斬之帝以何徽先守晉州有功欲免
之旣而以法不可廢遂并誅之而給槥車歸葬自是
驕將惰卒始知所懼不行姑息之政矣庚子賞高平
之功以李重進兼忠武節度使向訓兼義成節度使
張永德兼武信節度使史彥超爲鎮國節度使張永

德盛稱太祖皇帝之智勇帝擢太祖皇帝爲殿前都
虞候領嚴州刺史以馬仁瑀爲控鶴弓箭直指指揮使
馬全义爲散員指揮使自餘將校遷拜者凡數十人
士卒有自行間擢主軍廂者釋趙晁之囚北漢主收
散卒繕甲兵完城塹以備周楊衮將其眾北屯代州
北漢主遣王得中送衮因求救於契丹契丹主遣得
中還報許發兵救晉陽壬寅以符彥卿爲河東行營
都部署兼知太原行府事以郭崇副之向訓爲都監
李重進爲馬步都虞候史彥超爲先鋒都指揮使將
步騎二萬發潞州仍詔王彥超韓通自陰地關入與

彥卿合軍而進又以劉詞爲隨駕部署保大節度使
白重贊副之夏四月北漢孟縣降符彥卿軍晉陽
城下王彥超攻汾州北漢防禦使董希顏降帝遣萊
州防禦使康延沼攻遼州密州防禦使田瓊攻沁州
皆不下供備庫副使太原李謙溥單騎說遼州刺史
張漢超漢超卽降乙卯葬聖神恭肅文武孝皇帝
於嵩陵廟號太祖初帝遣符彥卿等北征但欲耀
兵於晉陽城下未議攻取旣入北漢境其民爭以食
物迎周師泣訴劉氏賦役之重願供軍須助攻晉陽
北漢州縣繼有降者帝聞之始有兼并之志遣使往

與諸將議之諸將皆言芻糧不足請且班師以俟再
舉帝不聽既而諸軍數十萬聚於太原城下軍士不
免剽掠北漢民失望稍稍保山谷自固帝聞之馳詔
禁止剽掠安撫農民止徵今歲租稅及募民入粟拜
官有差仍發澤潞晉絳慈隰及山東近便諸州民運
糧以饋軍己未遣李穀詣太原計度芻糧 庚申太
師中書令瀛文懿王馮道卒道少以孝謹知名唐莊
宗世始貴顯自是累朝不離將相三公三師之位爲
人清儉寬弘人莫測其喜愠滑稽多智浮沈取容嘗
著長樂老敘自述累朝榮遇之狀時人往往以德量

推之

歐陽修曰禮義廉恥國之四維四維不張國乃滅亡禮義治人之大法廉恥立人之大節況爲大臣而無廉恥天下其有不亂國家其有不亡者乎予讀馮道長樂老序見其自述以爲榮其可謂無廉恥者矣則天下國家可從而知也予於五代得全節之士三死事之臣十有五皆武夫戰卒豈於儒者果無其人哉得非高節之士惡時之亂薄其世而不肯出歟抑君天下者不足顧而莫能致之歟予嘗聞五代時有王凝者家青齊之間爲虢州司

戶參軍以疾卒於官凝家素貧一子尙幼妻李氏攜其子負其遺骸以歸東過開封府止於旅舍主人不納李氏顧天已暮不肯去主人牽其臂而出之李氏仰天慟哭曰我爲婦人不能守節而此手爲人所執邪卽引斧自斷其臂見者爲之嗟泣開封尹聞之白其事於朝厚卹李氏而笞其主人嗚呼士不自愛其身而忍恥以偷生者聞李氏之風宜少知愧哉

臣光曰天地設位聖人則之以制禮立法內有夫婦外有君臣婦之從夫終身不改臣之事君有死

無貳此人道之大倫也苟或廢之亂莫大焉范質
稱馮道厚德稽古宏才偉量雖朝代遷貿人無間
言屹若巨山不可轉也臣愚以爲正女不從二夫
忠臣不事二君爲女不正雖復華色之美織紵之
巧不足賢矣爲臣不忠雖復材智之多治行之優
不足貴矣何則大節已虧故也道之爲相歷五朝
入姓若逆旅之視過客朝爲仇敵暮爲君臣易面
變辭曾無愧怍大節如此雖有小善庸足稱乎或
以爲自唐室之亡羣雄力爭帝王興廢遠者十餘
年近者三四年雖有忠智將若之何當是之時失

臣節者非道一人豈得獨罪道哉臣愚以爲忠臣
憂公如家見危致命君有過則彊諫力爭國敗亡
則竭節致死智士邦有道則見邦無道則隱或滅
迹山林或優遊下僚今道尊寵則冠三師權任則
首諸相國存則依違拱嘿竊位素餐國亡則圖全
苟免迎謁勸進君則興亡接踵道則富貴自如茲
乃姦臣之尤安得與它人爲比哉或謂道能全身
遠害於亂世斯亦賢已臣謂君子有殺身成仁無
求生害仁豈專以全身遠害爲賢哉然則盜跖病
終而子路醢果誰賢乎抑此非特道之愆也時君

亦有責焉何則不正之女中士羞以爲家不忠之人中君羞以爲臣彼相前朝語其忠則反君事讎語其智則社稷爲墟後來之君不誅不棄乃復用以爲相彼又安肯忠於我而能獲其用乎故曰非特道之愆亦時君之責也

辛酉符彥卿奏北漢憲州刺史太原韓光愿嵐州刺史郭言皆舉城降王彥超韓通攻石州克之執刺史安彥進癸亥沁州刺史李廷誨降庚午帝發潞州趣晉陽癸酉北漢忻州監軍李勅殺刺史趙臯及契丹通事楊耨姑舉城降以勅爲忻州刺史五月丙

子帝至晉陽城下旗幟環城四十里楊衮疑北漢代
州防禦使鄭處謙貳於周召與計事欲圖之處謙知
之不往衮使胡騎數十守其城門處謙殺之因閉門
拒衮衮奔歸契丹契丹主怒其無功囚之處謙舉城
來降丁丑置靜塞軍於代州以鄭處謙爲節度使契
丹數千騎屯忻代之間爲北漢之援庚辰遣符彥卿
等將步騎萬餘擊之彥卿入忻州契丹退保忻口丁
亥置寧化軍於汾州以石沁二州隸之代州將桑珪
解文遇殺鄭處謙誣奏云潛通契丹符彥卿奏請益
兵癸巳遣李筠張永德將兵三千赴之契丹游騎時

至忻州城下丙申彥卿與諸將陳以待之史彥超將二十騎爲前鋒遇契丹與戰李筠引兵繼之殺契丹二千人彥超恃勇輕進去大軍浸遠眾寡不敵爲契丹所殺筠僅以身免周兵死傷甚眾彥卿退保忻州尋引兵還晉陽府州防禦使折德展將州兵來朝辛丑復置永安軍於府州以德展爲節度使時大發兵夫東自懷孟西及蒲陝以攻晉陽不克會久雨士卒疲病及史彥超死乃議引還初王得中返自契丹值周兵圍晉陽畱止代州及桑珪殺鄭處謙囚得中送於周軍帝釋之賜以帶馬問虜兵何時當至得中曰

臣受命送楊褒它無所求或謂得中曰契丹許公發兵公不以實告契丹兵卽至公得無危乎得中太息曰吾食劉氏祿有老母在圍中若以實告周人必發兵據險而拒之如此家國兩亡吾獨生何益不若殺身以全家國所得多矣甲辰帝以得中欺罔縊殺之乙巳帝發晉陽匡國節度使藥元福言於帝曰進軍易退軍難帝曰朕一以委卿元福乃勒兵成列而殿北漢果出兵追躡元福擊走之然軍還忽遽芻糧數十萬在城下者悉焚棄之軍中訛言相驚或相剽掠軍須失亡不可勝計所得北漢州縣周所置刺史等

皆棄城走惟代州桑珪旣叛北漢又不敵歸周嬰城自守北漢遣兵攻拔之乙卯帝至潞州甲子至鄭州丙寅謁嵩陵庚午至大梁帝違眾議破北漢自是政事無大小皆親決百官受成於上而已河南府推官高錫上書諫以爲四海之廣萬機之眾雖堯舜不能獨治必擇人而任之今陛下一以身親之天下不謂陛下聰明睿智足以兼百官之任皆言陛下褊迫疑忌舉不信羣臣也不若選能知人公正者以爲宰相能愛民聽訟者以爲守令能豐財足食者使掌金穀能原情守法者使掌刑獄陛下但垂拱明堂視其功

過而賞罰之天下何憂不治何必降君尊而代臣職
屈貴位而親賤事無乃失爲政之本乎帝不從錫河
中人也 北漢主憂憤成疾悉以國事委其子侍衛
都指揮使承鈞 初帝與北漢主相拒於高平命前
澤州刺史李彥崇將兵守江豬嶺遏北漢主歸路彥
崇聞樊愛能等南遁引兵退北漢主果自其路遁去
八月己酉貶彥崇率府副率 冬十一月北漢主疾
病命其子承鈞監國尋殂遣使告哀於契丹契丹遣
驃騎大將軍知內侍省事劉承訓冊命承鈞爲帝更
名鈞北漢孝和帝性孝謹旣嗣位勤於爲政愛民禮

通鑑綱目卷之三十六
三
士境內粗安每上表於契丹主稱男契丹主賜之詔
謂之兒皇帝

三年夏四月北漢葬神武帝於交城北山廟號世祖
張溥曰郭崇韜死於魏王安重誨戮於明宗以
震主之臣處衰季之朝欲保令終其道誠難然
未有如漢隱帝殺楊邠史弘肇王章之甚者也
高祖起晉陽入洛汴兵不血刃皆弘肇力楊邠
長於吏事王章志在富國三人斷急所病不知
大體要其一念奉公死豈有二難發纖人宗族
糜粉仰天呼冤四海動色又密使紛出詔殺郭

威王峻王殷當此時延頸待戮忍死無歸或者
伍尙蕭懿爾郭威佐漢開國勲勞崇重出鎮鄴
都兼領樞密大權掌握內外咸制忽滅其家下
片符斬境上危窮思變杖兵向闕豈獨威爲身
計無何出此卽旁觀者亦不願威卽死也漢呂
后欲盡誅劉氏遣灌嬰擊齊嬰至滎陽反與齊
王諸侯連和以待呂氏變宋廢帝惡晉安王子
勛命朱景雲送藥賜死景雲至湓口停不進鄧
琬知其謀卽稱子勛教令起兵從來事勢窮極
類必有變不生於外必生於內否則生於內外

之間或洩言左右或濡遲俄頃急而求生禍必
凶國隱帝之命李洪義殺王殷郭崇威曹威殺
郭威王峻也豈不謂詔至立誅其易也猶廣政
殿東廡下耳孰知李洪義畏不敢發郭崇威曹
威心不能平郭威遂激眾怒趣兵河上李太后
命隱帝按兵守城飛詔諭之可全君臣之禮乃
聶文進慕容彥超大言好鬪帝竟違命出征賊
於亂兵之手夫汜水之變莊宗不先死李嗣源
必不敢篡唐趙村之亂隱帝不先死郭威入朝
未必遽弑君以號令天下也銜命者需忍一時

走險者謀成篡竊禍亂忽來天心人事須臾之
際耳可不畏哉澶州兵變威被黃旗董裔說劉
贊急召張令超夜奪郭崇威兵北走晉陽劉崇
聞隱帝遇害欲舉兵南向李驤勸其逾太行據
孟津俟贊卽位後還鎮二策若行猶可藉抗衡
之勢待危亡之隙皆不見信遂至湘陰遭弑北
漢隅立求援契丹以小敵大何益乎

通鑑紀事本末卷二百三十八

通鑑紀事本末卷二百三十九

宋建安袁樞編輯

明太倉張溥論正

世宗征淮南

後周世宗顯德二年春三月上謂宰相曰朕每思致治之方未得其要寢食不忘又自唐晉以來吳蜀幽并皆阻聲教未能混一宜命近臣著爲君難爲臣不易論及開邊策一篇朕將覽焉比部郎中王朴獻策以爲中國之失吳蜀幽并皆由失道今必先觀所以失之之原然後知所以取之之術其始失之也莫不

以君暗臣邪兵驕民困姦黨內熾武夫外橫因小致大積微成著今欲取之莫若返其所爲而已夫進賢退不肖所以收其才也恩隱誠信所以結其心也賞功罰罪所以盡其力也去奢節用所以豐其財也時使薄斂所以阜其民也俟羣才旣集政事旣治財用旣充士民旣附然後舉而用之功無不成矣彼之人觀我有必取之勢則知其情狀者願爲間諜知其山川者願爲鄉導民心旣歸天意必從矣凡攻取之道必先其易者唐與吾接境幾二千里其勢易擾也擾之當以無備之處爲始備東則擾西備西則擾東彼

必奔走而救之奔走之間可以知其虛實彊弱然後
避實擊虛避彊擊弱未須大舉且以輕兵擾之南人
懦怯聞小有警必悉師以救之師數動則民疲而財
竭不悉師則我可以乘虛取之如此江北諸州將悉
爲我有旣得江北則用彼之民行我之法江南亦易
取也得江南則嶺南巴蜀可傳檄而定南方旣定則
燕地必望風內附若其不至移兵攻之席卷可平矣
惟河東必死之寇不可以恩信誘必當以彊兵制之
然彼自高平之敗力竭氣沮必未能爲邊患宜且以
爲後圖俟天下旣平然後伺間一舉可擒也今士卒

精練甲兵有備羣下畏法諸將效力期年之後可以
出師宜自夏秋蓄積實邊矣上欣然納之時羣臣多
守常偷安所對少有可取者惟朴神峻氣勁有謀能
斷凡所規畫皆稱上意上由是重其器識未幾遷左
諫議大夫知開封府事 唐主性和柔好文華而喜
人順己由是諂諛之臣多進用政事日亂旣克建州
破湖南益驕有吞天下之志李守貞慕容彥超之叛
皆爲之出師遙爲聲援又遣使自海道通契丹及北
漢約共圖中國值中國多事未暇與之校先是每冬
淮水淺涸唐人常發兵戍守謂之把淺壽州監軍吳

廷紹以爲疆場無事坐費貲糧悉罷之清淮節度使
劉仁贍上表固爭不能得十一月乙未朔帝以李穀
爲淮南道前軍行營都部署兼知廬壽等行府事以
忠武節度使王彥超副之督侍衛馬軍都指揮使韓
令坤等十二將以伐唐令坤磁州武安人也 汴水
自唐末潰決自埧橋東南悉爲污澤上謀擊唐先命
武寧節度使武行德發民夫因故堤疏導之東至泗
上議者皆以爲難成上曰數年之後必獲其利 唐
人聞周兵將至而懼劉仁贍神氣自若部分守禦無
異平日眾情稍安唐主以神武統軍劉彥貞爲北面

行營都部署將兵二萬趣壽州奉化節度使同平章
事皇甫暉爲應援使常州團練使姚鳳爲應援都監
將兵三萬屯定遠召鎮南節度使宋齊丘還金陵謀
國難以翰林承旨戶部尙書殷崇義爲吏部尙書知
樞密院 李穀等爲浮梁自正陽濟淮十二月甲戌
穀奏王彥超敗唐兵二千餘人於壽州城下己卯又
奏先鋒都指揮使白延遇敗唐兵千餘人於山口鎮
帝詔吳越王弘俶出兵擊唐

三年春正月丁酉李穀奏敗唐兵千餘人於上窰戊
戌發開封府曹滑鄭州之民十餘萬築大梁外城

庚子帝下詔親征淮南以宣徽南院使鎮安節度使
向訓權東京畱守端明殿學士王朴副之彰信節度
使韓通權點檢侍衛司及在京內外都巡檢命侍衛
都指揮使歸德節度使李重進將兵先赴正陽河陽
節度使白重贊將親兵三千屯潁上壬寅帝發大梁
李穀攻壽州久不克唐劉彥貞引兵救之至來遠鎮
距壽州二百里又以戰艦數百艘趣正陽爲攻浮梁
之勢李穀畏之召將佐謀曰我軍不能水戰若賊斷
浮梁則腹背受敵皆不歸矣不如退守浮梁以待車
駕上至圍鎮聞其謀亟遣中使乘驛止之比至已焚

芻糧退保正陽丁未帝至陳州亟遣李重進引兵趣淮上辛亥李穀奏賊艦中流而進弩礮所不能及若浮梁不守則眾心動搖須至退軍今賊艦日進淮水日漲若車駕親臨萬一糧道阻絕其危不測願陛下且駐蹕陳潁俟李重進至臣與之共度賊艦可禦浮梁可完立具奏聞但若厲兵秣馬春去冬來足使賊中疲弊取之未晚帝覽奏不悅劉彥貞素驕貴無才略不習兵所歷藩鎮專爲貪暴積財巨億以賂權要由是魏岑等爭譽之以爲治民如龔黃用兵如韓彭故周師至唐主首用之其裨將咸師朗等皆勇而無

謀聞李穀退喜引兵直抵正陽旌旗輜重數百里劉仁贍及池州刺史張全約固止之仁贍曰公軍未至而敵人先遁是畏公之威聲也安用速戰萬一失利則大事去矣彥貞不從旣行仁贍曰果遇必敗乃益兵乘城爲備李重進度淮逆戰於正陽東大破之斬彥貞生擒咸師朗等斬首萬餘級伏尸三十里收軍資器械三十餘萬是時江淮久安民不習戰彥貞旣敗唐人大恐張全約收餘眾犇壽州劉仁贍表全約爲馬步左廂都指揮使皇甫暉姚鳳退保清流關滁州刺史王紹顏委城走壬子帝至永寧鎮謂侍臣曰

聞壽州圍解農民多歸村落今聞大軍至必復入城
憐其聚爲餓殍宜先遣使存撫各令安業甲寅帝至
正陽以李重進代李穀爲淮南道行營都招討使以
穀判壽州行府事丙辰帝至壽州城下營於淝水之
陽命諸軍圍壽州徙正陽浮梁於下蔡鎮丁巳徵宋
亳陳潁徐宿許蔡等州丁夫數十萬以攻城晝夜不
息唐兵萬餘人維舟於淮營於塗山之下庚申帝命
太祖皇帝擊之太祖皇帝遣百餘騎薄其營而僞遁
伏兵邀之大敗唐兵於渦口斬其都監何延錫等奪
戰艦五十餘艘詔以武平節度使兼中書令王逵

爲南面行營都統使攻唐之鄂州唐主聞湖南兵將至命武昌節度使何敬洙徙民入城爲固守之計敬洙不從使除地爲戰場曰敵至則與兵民俱死於此耳唐主善之 二月丙寅下蔡浮梁成上自往視之戊辰廬壽光黃巡檢使元城司超奏敗唐兵三千餘人於盛唐擒都監高弼等獲戰艦四十餘艘上命太祖皇帝倍道襲清流關皇甫暉等陳於山下方與前鋒戰太祖皇帝引兵出山後暉等大驚走入滁州欲斷橋自守太祖皇帝躍馬麾兵涉水直抵城下暉曰人各爲其主願容成列而戰太祖皇帝笑而許之暉

整眾而出太祖皇帝擁馬頸突陳而入大呼曰吾止
取皇甫暉他人非吾敵也手劍擊暉中腦生擒之并
擒姚鳳遂克滁州後數日宣祖皇帝爲馬軍副都指
揮使引兵夜半至滁州城下傳呼開門太祖皇帝曰
父子雖至親城門王事也不敢奉命明日乃得入上
遣翰林學士竇儀籍滁州帑藏太祖皇帝遣親吏取
藏中絹儀曰公初克城時雖傾藏取之無傷也今旣
籍爲官物非有詔書不可得也太祖皇帝由是重儀
詔左金吾衛將軍馬崇祚知滁州初永興節度使劉
詞遺表薦其幕僚薊人趙普有才可用會滁州平范

質薦普爲滁州軍事判官太祖皇帝與語悅之時獲盜百餘人皆應死普請先訊鞫然後決所活什七八太祖皇帝益奇之太祖皇帝威名日甚每臨陳必以繁纓飾馬鎧仗鮮明或曰如此爲敵所識太祖皇帝曰吾固欲其識之耳唐主遣泗州牙將王知朗齎書抵徐州稱唐皇帝奉書大周皇帝請息兵修好願以兄事帝歲輸貨財以助軍費甲戌徐州以聞帝不答戊寅命前武勝節度使侯章等攻壽州水寨決其壕之西北隅導壕水入於淝太祖皇帝遣使獻皇甫暉等暉傷甚見上臥而言曰臣非不忠於所事但士卒

勇怯不同耳臣歸日屢與契丹戰未嘗見兵精如此
因盛稱太祖皇帝之勇上釋之後數日卒帝訶知揚
州無備己卯命韓令坤等將兵襲之戒以無得殘民
其李氏陵寢遣人與李氏人共守護之唐主兵屢敗
懼亡乃遣翰林學士戶部侍郎鍾謨工部侍郎文理
院學士李德明奉表稱臣來請平獻御服茶藥及金
器千兩銀器五千兩繒錦二千匹犒軍牛五百頭酒
二千斛壬午至壽州城下謨德明素辯口上知其欲
遊說盛陳甲兵而見之曰爾主自謂唐室苗裔宜知
禮義異於它國與朕止隔一水未嘗遣一介修好惟

泛海通契丹捨華事夷禮義安在且汝欲說我令罷
兵邪我非六國愚主豈汝口舌所能移邪可歸語汝
主亟來見朕再拜謝過則無事矣不然朕欲往觀金
陵城借府庫以勞軍汝君臣得無悔乎謨德明戰栗
不敢言 吳越王弘俶遣兵屯境上以俟周命 乙
酉韓令坤奄至揚州平旦先遣白延遇以數百騎馳
入城城中不之覺令坤繼至唐東都營屯使賈崇焚
官府民舍棄城南走副畱守工部侍郎馮延魯髡髮
被僧服匿於佛寺軍士執之令坤慰撫其民使皆安
堵庚寅王逵奏拔鄂州長山寨執其將陳澤等獻之

辛卯太祖皇帝奏唐天長制置使耿謙降獲芻糧二十餘萬韓令坤攻唐泰州拔之刺史方訥奔金陵

唐主遣人以蠟丸求救於契丹壬辰靜安軍使何繼筠獲而獻之以給事中高防權知泰州三月甲午朔上行視水寨至淝橋自取一石馬上持之至寨以供礮從官過橋者人齎一石太祖皇帝乘皮船入壽春壕中城上發連弩射之矢大如屋椽牙將館陶張瓊遽以身蔽之矢中瓊髀死而復蘇鏃著骨不可出瓊飲酒一大卮令人破骨出之流血數升神色自若唐主復以右僕射孫晟爲司空遣與禮部尙書王崇

質奉表入見稱自天祐以來海內分崩或跨據一方
或遷革異代臣紹襲先業奄有江表顧以瞻烏未定
附鳳何從今天命有歸聲教遠被願比兩浙湖南仰
奉正朔謹守土疆乞收薄伐之威赦其後服之罪首
於下國俾作外臣則柔遠之德云誰不服又獻金千
兩銀十萬兩羅綺二千匹晟謂馮延巳曰此行當在
左相晟若辭之則負先帝旣行知不免中夜歎息謂
崇質曰君家百口宜自爲謀吾思之熟矣終不負永
陵一抔土餘無所知 光舒黃招安巡檢使行光州
刺史何超以安隨申蔡四州兵數萬攻光州丙申超

奏唐光州刺史張紹棄城走都監張承翰以城降丁
西行舒州刺史郭令圖拔舒州 唐蘄州將李福殺
其知州王承雋舉州來降遣六宅使齊藏珍攻黃州
秦鳳之平也上赦所俘蜀兵以隸軍籍從征淮南
復亡降於唐癸卯唐主表獻百五十人上悉命斬之
丙午孫晟等至上所庚戌上遣中使以孫晟詣壽
春城下示劉仁瞻且招諭之仁瞻見晟戎服拜於城
上晟謂仁瞻曰君受國厚恩不可開門納寇上聞之
甚怒晟曰臣爲唐宰相豈可教節度使外叛邪上乃
釋之 唐主使李德明孫晟言於上請去帝號割壽

濠泗楚光海六州之地仍歲輸金帛百萬以求罷兵
上以淮南之地已半爲周有諸將捷奏日至欲盡得
江北之地不許德明見周兵日進奏稱唐主不知陛
下兵力如此之盛願寬臣五日之誅得歸白唐主盡
獻江北之地上乃許之晟因奏遣王崇質與德明俱
歸上遣供奉官安弘道送德明等歸金陵賜唐主詔
書其略曰但存帝號何爽歲寒倘堅事大之心終不
迫人於險又曰俟諸郡之悉來卽大軍之立罷言盡
於此更不煩云苟曰未然請從茲絕又賜其將相書
使熟議而來唐主復上表謝李德明盛稱上威德及

甲兵之彊勸唐主割江北之地唐主不悅宋齊丘以割地爲無益德明輕佻言多過實國人亦不之信樞密使陳覺副使李徵古素惡德明及孫晟使王崇質異其言因譖德明於唐主曰德明賣國求利唐主大怒斬德明於市唐主命諸道兵馬元帥齊王景達將兵拒周以陳覺爲監軍使前武安節度使邊鎬爲應援都軍使中書舍人韓熙載上書曰信莫信於親王重莫重於元帥安用監軍使爲唐主不從遣鴻臚卿潘承祐詣泉建召募驍勇承祐薦前永安節度使許文稹靜江指揮使陳德誠建州人鄭彥華林仁肇

唐主以文稹爲西面行營應援使彥華仁肇皆爲將
仁肇仁翰之弟也 夏四月甲子以侍衛親軍都指

揮使歸德節度使李重進爲廬壽等州招討使以武
寧節度使武行德爲濠州城下都部署 唐右衛將
軍陸孟俊自常州將兵萬餘人趣泰州周兵遁去孟
俊復取之遣陳德誠戍泰州孟俊進攻揚州屯於蜀
岡韓令坤棄揚州走帝遣張永德將兵救之令坤復
入揚州帝又遣太祖皇帝將兵屯六合太祖皇帝令
曰揚州兵有過六合者折其足令坤始有固守之志
帝自至壽春以來命諸軍晝夜攻城久不克會大雨

營中水深數尺攻具及士卒失亡頗多糧運不繼李德明失期不至乃議旋師或勸帝東幸濠州聲言壽州已破從之己巳帝自壽春循淮而東乙亥至濠州韓令坤敗唐兵於城東擒陸孟俊唐齊王景達將兵二萬自瓜步濟江距六合二十餘里設柵不進諸將欲擊之太祖皇帝曰彼設柵自固懼我也今吾眾不滿二千若往擊之則彼見吾眾寡矣不如俟其來而擊之破之必矣居數日唐出兵趣六合太祖皇帝奮擊大破之殺獲近五千人餘眾尙萬餘走渡江爭舟溺死者甚眾於是唐之精卒盡矣是戰也士卒有

不致力者太祖皇帝陽爲督戰以劍斫其皮笠明日
徧閱其笠有劍迹者數十人皆斬之由是部兵莫敢
不盡死先是唐主聞揚州失守命四旁發兵取之己
卯韓令坤奏敗揚州兵萬餘人於灣頭堰獲漣州刺
史秦進崇張永德奏敗泗州兵萬餘人於曲溪堰

丙戌以宣徽南院使向訓爲淮南節度使兼沿江招
討使渦口奏新作浮梁成丁亥帝自濠州如渦口帝
銳於進取欲自至揚州范質等以兵疲食少泣諫而
止帝嘗怒翰林學士竇儀欲殺之范質入救之帝望
見知其意卽起避之質趨前伏地叩頭諫曰儀罪不

至死臣爲宰相致陛下枉殺近臣罪皆在臣繼之以泣帝意解乃釋之 五月壬辰朔以渦口爲鎮淮軍

戊戌帝畱侍衛親軍都指揮使李重進等圍壽州自渦口北歸乙卯至大梁 六月壬申赦淮南諸州

繫囚除李氏非理賦役事有不便於民者委長吏以聞 侍衛步軍都指揮使彰信節度使李繼勳營於壽州城南唐劉仁贍伺繼勳無備出兵擊之殺士卒數百人焚其攻具 唐駕部員外郎朱元因奏事論用兵方略唐主以爲能命將兵復江北諸州 秋七月唐將朱元取舒州刺史郭令圖棄城走李平取蘄

州唐主以元爲舒州團練使平爲蘄州刺史元又取和州初唐人以茶鹽彊民而徵其粟帛謂之博徵又興營田於淮南民甚苦之及周師至爭奉牛酒迎勞而將帥不之恤專事俘掠視民如土芥民皆失望相聚山澤立堡壁自固操農器爲兵積紙爲甲時人謂之白甲軍周兵討之屢爲所敗先所得唐諸州多復爲唐有唐之援兵營於紫金山與壽州城中烽火相應淮南節度使向訓奏請以廣陵之兵併力攻壽春俟克城更圖進取詔許之訓封府庫以授揚州主者命揚州牙將分部按行城中秋毫不犯揚州民感悅

軍還或負糗糒以送之滁州守將亦棄城去皆引兵趣壽春唐諸將請據險以邀周師宋齊丘曰如此則怨益深不如縱之以德於敵則兵易解也乃命諸將各自守毋得擅出擊周兵由是壽春之圍益急齊王景達軍於濠州遙爲壽州聲援軍政皆出於陳覺景達署紙尾而已擁兵五萬無決戰意將吏畏覺無敢言者八月殿前都指揮使義成節度使張永德屯下蔡唐將林仁肇等以水陸軍援壽春永德與之戰仁肇以船實薪芻因風縱火欲焚下蔡浮梁俄而風回唐兵敗退永德爲鐵縆千餘尺距浮梁十餘步橫

絕淮流繫以巨木由是唐兵不能近 冬十月癸酉
李重進奏唐人寇盛唐鐵騎都指揮使王彥昇等擊
之斬首三千餘級彥昇蜀人也 壬午張永德奏敗
唐兵於下蔡是時唐復以水軍攻永德永德夜令善
游者沒其船下縻以鐵鎖縱兵擊之船不得進退溺
死者甚眾永德解金帶以賞善游者 甲申以太祖
皇帝爲定國節度使兼殿前都指揮使 張永德與
李重進不相悅永德密表重進有二心帝不之信時
二將各擁重兵眾心憂恐重進一日單騎詣永德營
從容宴飲謂永德曰吾與公幸以肺腑俱爲將帥奚

相疑若此之深邪永德意乃解眾心益安唐主聞之以蠟書遣重進誘以厚利其書皆謗毀及反間之語重進奏之初唐使者孫晟鍾謨從帝至大梁帝待之甚厚每朝會班之於中書省官之後時召見飲以醕酒問以唐事晟但言唐主畏陛下神武事陛下無二心及得唐蠟書帝大怒召晟責以所對不實晟正色抗辭請死而已問以唐虛實默然不對十一月乙巳帝命都承旨曹翰送晟於右軍巡院更以帝意問之翰與之飲酒數行從容問之晟終不言翰乃謂曰有敕賜相公死晟神色怡然索靴笏整衣冠南向拜曰

臣謹以死報國乃就刑并從者百餘人皆殺之貶鍾
謨耀州司馬旣而帝憐晟忠節悔殺之召謨拜衛尉
少卿 十二月壬申以張承德爲殿前都點檢 分
命中使發陳蔡宋亳潁兗曹單等州丁夫數萬城下
蔡 是歲唐主詔淮南營田害民尤甚者罷之遣兵
部郎中陳處堯持重幣浮海如契丹乞兵契丹不能
爲之出兵而畱處堯不遣處堯剛直有口辯久之忿
懟數面責契丹主契丹主亦不之罪也

四年春正月周兵圍壽春連年未下城中食盡齊王
景達自濠州遣應援使永安節度使許文稹都軍使

邊鎬北面招討使朱元將兵數萬沂淮救之軍於紫金山列十餘寨如連珠與城中烽火晨夕相應又築甬道抵壽春欲運糧以饋之綿亙數十里將及壽春李重進邀擊大破之死者五千人奪其二寨丁未重進以聞戊申詔以來月幸淮上劉仁瞻請以邊鎬守城自帥眾決戰齊王景達不許仁瞻憤邑成疾其幼子崇諫夜泛舟度淮北爲小校所執仁瞻命腰斬之左右莫敢救監軍使周廷構哭於中門以救之仁瞻不許廷構復使求救於夫人夫人曰妾於崇諫非不愛也然軍法不可私名節不可虧若貸之則劉氏爲

不忠之門妾與公何面目見將士乎趣命斬之然後
成喪將士皆感泣議者以唐援兵尙彊多請罷兵帝
疑之李穀寢疾在第二月丙寅帝使范質王溥就
與之謀穀上疏以爲壽春危困破在旦夕若鑾駕親
征則將士爭奮援兵震恐城中知亡必可下矣上悅
甲戌以王朴權東京畱守兼判開封府事以三司
使張美爲大內都巡檢以侍衛都虞候韓通爲京城
內外都巡檢乙亥帝發大梁先是周與唐戰唐水軍
銳敏周人無以敵之帝每以爲恨返自壽春於大梁
城西汴水側造戰艦數百艘命唐降卒教北人水戰

數月之後縱橫出沒殆勝唐兵至是命右驍衛大將軍王環將水軍數千自閔河沿潁入淮唐人見之大驚乙酉帝至下蔡三月己丑夜帝渡淮抵壽春城下庚寅旦躬擐甲胄軍於紫金山南命太祖皇帝擊唐先鋒寨及山北一寨皆破之斬獲三千餘級斷其甬道由是唐兵首尾不能相救至暮帝分兵守諸寨還下蔡唐朱元恃功頗違元帥節度陳覺與元有隙屢表元反覆不可將兵唐主以武昌節度使楊守忠代之守忠至濠州覺以齊王景達之命召元詣濠州計事將奪其兵元聞之憤怒欲自殺門下客宋垺說元

曰大丈夫何往不富貴何必爲妻子死乎辛卯夜元
與先鋒壕寨使朱仁裕等舉寨萬餘人降裨將時厚
卿不從元殺之帝慮其餘眾沿流東潰遽命虎捷左
廂都指揮使趙晁將水軍數千沿淮而下壬辰旦帝
軍於趙步諸將擊唐紫金山寨大破之殺獲萬餘人
擒許文稹邊鎬楊守忠餘眾果沿淮東走帝自趙步
將騎數百循北岸追之諸將以步騎循南岸追之水
軍自中流而下唐兵戰溺死及降者殆四萬人獲船
艦糧仗以十萬數晡時帝馳至荆山洪距趙步二百
餘里是夜宿鎮淮軍癸酉從官始至劉仁瞻聞援兵

敗扼吭歎息甲午發近縣丁夫數千城鎮淮軍爲二
城夾淮水徙下蔡浮梁於其間扼濠壽應援之路會
淮水漲唐濠州都監彭城郭廷謂以水軍沂淮欲掩
不備焚浮梁右龍武統軍趙匡贊覘知之伏兵邀擊
破之唐齊王景達及陳覺皆自濠州奔歸金陵惟
靜江指揮使陳德誠全軍而還戊戌以淮南節度使
向訓爲武寧節度使淮南道行營都監將兵戍鎮淮
軍己亥上自鎮淮軍復如下蔡庚子賜劉仁贍詔使
白擇禍福唐主議白督諸將拒周中書舍人喬匡舜
上疏切諫唐主以爲沮眾流撫州唐主問神衛統軍

朱匡業劉存忠以守禦方略匡業誦羅隱詩曰時來
天地皆同力運去英雄不自由存忠以匡業言爲然
唐主怒貶匡業撫州副使流存忠於饒州旣而竟不
敢自出甲辰帝耀兵於壽春城北唐清淮節度使兼
侍中劉仁贍病甚不知人丙午監軍使周廷構營田
副使孫羽等作仁贍表遣使奉之來降丁未帝賜仁
贍詔遣閤門使萬年張保續入城宣諭仁贍子崇讓
復出謝罪戊申帝大陳甲兵受降於壽春城北廷構
等昇仁贍出城仁贍臥不能起帝慰勞賜資復令入
城養病庚戌徙壽州治下蔡赦州境死罪以下州民

受唐文書聚山林者並召令復業勿問罪有嘗爲其
殺傷者毋得讎訟曷日政令有不便於民者令本州
條奏辛亥以劉仁贍爲天平節度使兼中書令制辭
略曰盡忠所事抗節無虧前代名臣幾人堪比朕之
伐叛得爾爲多是日卒追賜爵彭城郡王唐主聞之
亦贈太師帝復以清淮軍爲忠正軍以旌仁贍之節
以右羽林統軍楊信爲忠正節度使同平章事詔
開壽州倉賑飢民丙辰帝北還夏四月己巳至大梁
甲申分江南降卒爲六軍三十指揮號懷德軍
五月丁酉以太祖皇帝領義成節度使唐郭廷謂

將水軍斷渦口浮梁又襲敗武寧節度使武行德於
定遠行德僅以身免唐主以廷謂爲滁州團練使充
上淮水陸應援使 秋七月丁亥上治定遠軍及壽
春城南之敗以武寧節度使兼中書令武行德爲左
衛上將軍河陽節度使李繼勳爲右衛大將軍 冬
十月壬申帝發大梁十一月丙戌至鎮淮軍是夜五
鼓濟淮丁亥至濠州城西濠州東北十八里有灘唐
人柵其上環水自固謂周兵必不能涉戊子帝自攻
之命內殿直康保裔帥甲士數百乘橐駝涉水太祖
皇帝帥騎兵繼之遂拔之李重進破濠州南關城癸

已帝自攻濠州王審琦拔其水寨唐人屯戰船數百於城北植巨木於淮水以限周兵帝命水軍攻拔其木焚戰船七十餘艘斬首二千餘級又攻拔其羊馬城城中震恐丙申夜唐濠州團練使郭廷謂上表言臣家在江南今若遽降恐爲唐所種族請先遣使詣金陵稟命然後出降帝許之辛丑帝聞唐有戰船數百艘在渙水東欲救濠州自將兵夜發水陸擊之癸卯大破唐兵於洞口斬首五千餘級降卒二千餘人因鼓行而東所至皆下乙巳至泗州城下太祖皇帝先攻其南因焚城門破水寨及月城帝居於月城樓

督將士攻城 十二月乙卯唐泗州守將范再遇舉
城降以再遇爲宿州團練使上自至泗州城下禁軍
中芻蕘者毋得犯民田民皆感悅爭獻芻粟旣克泗
州無一卒敢擅入城者帝聞唐戰船數百艘泊洞口
遣騎訶之唐兵退保清口戊午旦上自將親軍自淮
北進命太祖皇帝將步騎自淮南進諸將以水軍自
中流進共追唐兵時淮濱久無行人葭葦如織多泥
淖溝塹士卒乘勝氣芟涉爭進皆忘其勞庚申追及
唐兵且戰且行金鼓聲聞數十里辛酉至楚州西北
大破之唐兵有沿淮東下者帝自追之太祖皇帝爲

前鋒行六十里擒其保義節度使濠泗楚海都應援使陳承昭以歸所獲戰船燒沈之餘得三百餘艘士卒殺溺之餘得七千餘人唐之戰船在淮上者於是盡矣 郭廷謂使者自金陵還知唐不能救命錄事參軍鄱陽李延鄒草降表延鄒責以忠義廷謂以兵臨之延鄒擲筆曰大丈夫終不負國爲叛臣作降表廷謂斬之舉濠州降得兵萬人糧數萬斛唐主賞李延鄒之子以官壬戌帝濟淮至楚州營於城西北乙丑唐雄武軍使知漣水縣事崔萬迪降丙寅以郭廷謂爲亳州防禦使戊辰帝攻楚州克其月城庚午郭

廷謂見於行宮帝曰朕南征以來江南諸將敗亡相繼獨卿能斷渦口浮梁破定遠寨所以報國足矣濠州小城使李璟自守能守之乎使將濠州兵攻天長帝遣鐵騎左廂都指揮使武守琦將騎數百趣揚州至高郵唐人悉焚揚州官府民居驅其人南度江後數日周兵至城中餘癰病十餘人而已癸酉守琦以聞帝聞泰州無備遣兵襲之丁丑拔泰州

五年春正月丁亥右龍武將軍王漢璋奏克海州

己丑以侍衛馬軍都指揮使韓令坤權揚州軍府事上欲引戰艦自淮入江阻北神堰不得度欲鑿楚

州西北鶴水以通其道遣使行視還言地形不便計功甚多上自往視之授以規畫發楚州民夫浚之旬日而成用功甚省巨艦數百艘皆達於江唐人大驚以爲神 壬辰拔靜海軍始通吳越之路先是帝遣左諫議大夫長安尹日就等使吳越語之曰卿今去雖汎海比還淮南已平當陸歸耳已而果然 周兵攻楚州踰四旬唐楚州防禦使張彥卿固守不下乙巳帝自督諸將攻之宿於城下丁未克之彥卿與都監鄭昭業猶帥眾拒戰矢刃皆盡彥卿舉繩牀以鬪而死所部千餘人至死無一人降者 荆南節度使

高保融遣指揮使魏璘將戰船百艘東下會伐唐至
於鄂州 唐以天長爲雄州以建武軍使易文贇爲
刺史二月甲寅文贇舉城降 戊午帝發楚州丁卯
至揚州命韓令坤發丁夫萬餘築故城之東南隅爲
小城以治之 乙亥黃州刺史司超奏與控鶴右廂
都指揮使王審琦攻唐舒州擒其刺史施仁望 三
月壬午朔帝如泰州 唐太弟景遂前後凡十表辭
位且言今國危不能扶請出就藩鎮燕王弘冀嫡長
有軍功宜爲嗣謹奉上太弟寶冊齊王景達亦以敗
軍辭元帥唐主乃立景遂爲晉王加天策上將軍江

南西道兵馬元帥洪州大都督太尉尚書令以景達
爲浙西道元帥潤州大都督景達以浙西方用兵固
辭改撫州大都督立弘冀爲皇太子參決庶政 辛
卯上如迎鑾鎮屢至江口遣水軍擊唐兵破之上聞
唐戰艦數百艘泊東沛州將趣海口扼蘇杭路遣殿
前都虞候慕容延釗將步騎右神武統軍宋延渥將
水軍循江而下甲午延釗奏大破唐兵於東沛州上
遣李重進將兵趣廬州唐主聞上在江上恐遂南度
又恥降號稱藩乃遣兵部侍郎陳覺奉表請傳位於
太子弘冀使聽命於中國時淮南惟廬舒蘄黃未下

丙申覺至迎鑾見周兵之盛白上請遣人度江取表
獻四州之地畫江爲境以求息兵辭指甚哀上曰朕
本興師止取江北今爾主能舉國內附朕復何求覺
拜謝而退丁酉覺請遣其屬閤門承旨劉承遇如金
陵上賜唐主書稱皇帝恭問江南國主慰納之戊戌
吳越奏遣上直都指揮使處州刺史邵可遷秀州刺
史路彥銖以戰艦四百艘士卒萬七千人屯通州南
岸唐主復遣劉承遇奉表稱唐國主請獻江北四州
歲輸貢物數十萬於是江北悉平得州十四縣六十
庚子上賜唐主書諭以緣江諸軍及兩浙湖南荆南

兵並當罷歸其廬蘄黃三道亦令斂兵近外俟彼將士及家屬皆就道可遣人召將校以城邑付之江中舟艦有須往來者並令就北岸引之辛丑陳覺辭行又賜唐主書諭以不必傳位於子壬寅上自迎鑾復如揚州癸卯詔吳越荆南軍各歸本道賜錢弘俶犒軍帛三萬匹高保融一萬匹甲辰置保信軍於廬州以右龍武統軍趙匡贊爲節度使丙午唐主遣馮延巳獻銀錢絹茶穀共百萬以犒軍己酉命宋延渥將水軍三千泝江巡警庚戌敕淮南節度使楊行密故昇府節度使徐溫等墓並量給守戶其江南羣臣

墓在江北者亦委長吏以時檢校辛亥唐主遣其臨
汝公徐遼代已來上壽 五月詔賞勞南征士卒及
淮南新附之民 辛卯以太祖皇帝領忠武節度使
唐主避周諱更名景下令去帝號稱國主凡天子
儀制皆有降損去年號用周正朔仍告於太廟左僕
射同平章事馮延巳罷爲太子太傅門下侍郎同平
章事嚴續罷爲少傅樞密使兵部侍郎陳覺罷守本
官初馮延巳以取中原之策說唐主由是有寵延巳
常笑烈祖戢兵爲齷齪曰安陸所喪纔數千兵爲之
輟食咨嗟者旬日此田舍翁識量耳安足與成大事

豈如今上暴師數萬於外而擊毬宴樂無異平日真英主也延己與其黨談論常以天下爲己任更相唱和翰林學士常夢錫屢言延己等浮誕不可信唐主不聽夢錫曰奸言似忠陛下不悟國必亡矣及臣服於周延己之黨相與言有謂周爲大朝者夢錫大笑曰諸公常欲致君堯舜何意今日自爲小朝邪眾默然自唐主內附帝止因使者賜書未嘗遣使至其國己酉始命太僕卿馮延魯衛尉少卿鍾謨使於唐賜以御衣玉帶等及犒軍帛十萬并今年欽天歷劉承遇之還金陵也唐主使陳覺白帝以江南無鹵田願

得海陵鹽監南屬以贍軍帝曰海陵在江北難以交
居當別有處分至是詔歲支鹽三十萬斛以給江南
所俘獲江南士卒稍稍歸之 秋八月辛丑馮延魯
鍾謨來自唐唐主手表謝恩其略曰天地之恩厚矣
父母之恩深矣子不謝父人何報天惟有赤心可酬
大造又乞比藩方賜詔書又稱有情事令鍾謨上奏
乞令早還唐主復令謨白帝欲傳位太子九月丁巳
以延魯爲刑部侍郎謨爲給事中己未先遣謨還賜
書諭以未可傳位之意唐主復遣吏部尙書知樞密
院殷崇義來賀天清節 冬十一月乙丑唐主復遣

禮部侍郎鍾謨入見 初唐太傅兼中書令楚國公

宋齊丘多樹朋黨欲以專固朝權躁進之士爭附之

推獎以爲國之元老樞密使陳覺副使李徵古恃齊

丘之勢尤驕慢及許文稹等敗於紫金山覺與齊丘

景達自濠州遁歸國人恟懼唐主嘗歎曰吾國家一

朝至此因泣下徵古曰陛下當治兵以扞敵涕泣何

爲豈飲酒過量邪將乳母不至邪唐主色變而徵古

舉止自若會司天奏天文有變人主宜避位禳災唐

主乃曰禍難方殷吾欲釋去萬機棲心沖寂誰可以

託國者徵古曰宋公造國手也陛下如厭萬機何不

舉國授之覺曰陛下深居禁中國事皆委宋公先行
後聞臣等時入侍談釋老而已唐主心愠卽命中書
舍人豫章陳喬草詔行之喬惶恐請見曰陛下一署
此詔臣不復得見矣因極言其不可唐主笑曰爾亦
知其非邪乃止由是因晉王出鎮以徵古爲之副覺
白周還亦罷近職鍾謨素與李德明善以德明之死
怨齊王及奉使歸唐言於唐主曰齊王乘國之危遽
謀篡竊陳覺李徵古爲之羽翼理不可容陳覺之白
周還矯以帝命謂唐主曰聞江南連歲拒命皆宰相
嚴續之謀當爲我斬之唐主知覺素與續有隙固未

之信鍾謨請覆之於周唐主乃因謨復命上言久拒王師皆臣愚迷非續之罪帝聞之大驚曰審如此則續乃忠臣朕爲天下主豈教人殺忠臣乎謨還以白唐主唐主欲誅齊丘等復遣謨入稟於帝帝以異國之臣無所可否十二月己亥唐主命知樞密院殷崇義草詔暴齊丘覺徵古罪惡聽齊丘歸九華山舊隱官爵悉如故覺責授國子博士宣州安置徵古削奪官爵賜自盡黨與皆不問遣使告於周

六年春正月唐宋齊丘至九華山唐主命鎖其第穴牆給飲食齊丘歎曰吾昔獻謀幽讓皇帝族於泰州

宜其及此乃縊而死諡曰醜繆 夏六月唐清源節
度使畱從效遣使入貢請置進奏院於京師直隸中
朝戊寅詔報以江南近服方務綏懷卿久奉金陵未
可改圖若置邸上都與彼抗衡受而有之罪在於朕
卿遠修職貢足表忠勤勉事舊君且宜如故如此則
於卿篤始終之義於朕盡柔遠之宜惟乃通方諒達
予意唐主遣其子紀公從善與鍾謨俱入貢上問謨
曰江南亦治兵修守備乎對曰旣臣事大國不敢復
爾上曰不然曷時則爲仇敵今日則爲一家吾與汝
國大義已定保無它虞然人生難期至於後世則事

通鑑綱目卷三十九
不可知歸語汝主可及吾時完城郭繕甲兵據守要害爲子孫計謨歸以告唐主唐主乃城金陵凡諸州城之不完者葺之戍兵少者益之

臣光曰或問臣五代帝王唐莊宗周世宗皆稱英武二主孰賢臣應之曰夫天子所以統治萬國討其不服撫其微弱行其號令一其法度敦明信義以兼愛兆民者也莊宗旣滅梁海內震動湖南馬氏遣子希範入貢莊宗曰比聞馬氏之業終爲高郁所奪今有兒如此郁豈能得之哉郁馬氏之良佐也希範兄希聲聞莊宗言卒矯其父命而殺之

此乃市道商賈之所爲豈帝王之體哉蓋莊宗善戰者也故能以弱晉勝彊梁旣得之曾不數年外內離叛置身無所誠由知用兵之術不知爲天下之道故也世宗以信令御羣臣以正義責諸國王環以不降受賞劉仁贍以堅守蒙褒嚴續以盡忠獲存蜀兵以反覆就戮馮道以失節被棄張美以私恩見疎江南未服則親犯矢石期於必克旣服則愛之如子推誠盡言爲之遠慮其宏規大度豈得與莊宗同日語哉書曰無偏無黨王道蕩蕩又曰大邦畏其力小邦懷其德世宗近之矣


張溥曰唐主璟李昇長子也昇未篡吳時璟卽居要職用事旣嗣昇位首平張遇賢亂又值閩楚衰殘晉漢多故招納羣盜頗能自雄及周師南征世宗詔責其迫奪閩越塗炭湘潭應接慕容勾誘契丹璟懼無以對綱目書周顯德二年敗唐兵於壽州三年春正月周主白將伐唐斬劉彥貞二月克滁州擒皇甫暉姚鳳自此唐敗周勝月不絕書四年則唐主盡獻江北地當時出師逾載旗偃風行周作檀來之歌唐執小朝之禮淮南十四州談笑坐得雖其間劉仁瞻殺

子不悔張彥卿等千人盡死孫晟奉使仗節李
延鄒不草降表唐臣忠義足風末世然國微地
蹙勢已無救至今歛吁猶有恨於宋齊丘及馮
延巳等五鬼也齊丘助昇篡逆環立復相陳覺
魏岑等皆其所引周師數至五鬼不發一策齊
丘覺復縱敵不戰迫朱元出走禍難日殷羣小
戲侮人主請委政宋公始而大言用兵旣而同
聲賣國有臣若此不亡已幸況危削哉天寶之
亂禍立宗者李林甫而爲之死者顏杲卿建中
之亂禍德宗者盧杞而爲之死者段秀實今唐

失江北實齊王等造之反貽仁瞻等以死竊國者肘腋之臣殉國者卑疏之士其來久矣世宗用兵威武出討北漢高平之戰誅樊愛能何徽等以肅軍政驕將惰卒惕然知懼所向成功淮南之克殆繇於此李璟削尊稱輸臣節孫權事魏蕭詧奉周未若其恭順也世宗與爲一家令其修城隍治要害爲子孫計服之以義懷之以仁有張弛文武之道焉世宗初遣符彥卿等北征但欲耀兵未議攻取入北漢境民爭出迎始圖兼并然數十萬眾聚太原城下民苦剽掠稍

稍保山澤自固其伐唐也百姓爭奉牛酒將帥
不恤白甲軍興周屢敗北中國長勝之師民一
觖望亦得而幾失乃知周太祖舉事時王峻許
眾旬日掠城非長策也

通鑑紀事本末卷二百三十九



通鑑紀事本末卷三十三十九

